

東洲草堂文鈔

東洲艸堂文鈔卷二

道州 何紹基 子貞

使蜀奏藁

請

旨交議整頓考試力除弊竇摺

奏爲請

旨交議遵辦事臣自按試以來力除弊竇務拔真才非不漸有端緒惟積習相沿有顯違舊章急須整頓者有時勢不同應議變通者謹擇其尤要爲我

皇上陳之

一定例學政考試皆以知府及直隸州知州充當提調違者議處乃臣考過各屬惟潼川府阮祐署西陽州伍雲錦親當提調

其它皆派首縣或外縣或候補縣代辦該府州不過養尊處優
憚於起早而縣令事權既輕又隔縣之生童書差多不服其管
束以致文場槍鬪武場滋鬧之案層見疊出應請
旨飭令各府州恪遵功令親當提調有委員代辦者明定處分
成都府文武童生多至三四萬人尤不得委員代辦以專責成
而重試典

一川省考試文場槍鬪之案過多每府或至七八起與他省情
形迥殊斷不能照律概予軍流故一交提調輒爲設法弭臣
竊以爲法過峻而不行何如法從輕而可用重杖嚴枷隨枷示
眾似寬實猛儘足蔽辜至廩生保槍知情者斥革不知情者酌
量降附似不得輕予開復請由刑部斟酌地方情形變通議覆
辦理

一川省武童愈考愈多重名頂圖之弊曰甚一日學政按名校閱曰不暇給往往考武日期倍於文場該童等恃眾滋鬧動輒闐至大堂不服彈壓學額止有此數被黜者又豈能安靜居家實爲地方隱患舊例學額一名錄送武童二十名今或數倍未已應請由部嚴定章程請旨飭遵辦理

一馬射監試武員例不派本省人川省自參游以下多係本省人故總督提督派來監射之員往往隔府城千里內外監射差事多或四五日少或一兩日武員賢否不一儘有妄自尊大沿途騷擾者且人地生疏難資彈壓至取錄武生權在學政監射本屬具文應請川省武場卽派本郡職分較大之武員監射以歸簡捷

一書院主講例由督撫學政採訪延致并准學政三年任滿時
考覈獎勵誠以學政甄拔於臨時書院栽培於平日實屬相爲
表裏臣查川省大吏於士習文風視猶隔膜致各府縣書院主
講止爲應酬上司人情學政不能過問臣於所過地方隨時查
訪或久不到館或空領束脩卽有到館者人品學問多屬不堪
其爲士論所服者十不一二查學政有教士之責必不肯專徇
情面應請各府縣書院主講由學政隨時查核其竝不到館止
領乾脩者一并裁革

一臣衙門書吏承差兩項人數過多久違定例臣於到任後先
行局試書辦令擬作告示承差令默寫四書復察其人妥實者
照定額挑取當差餘俱汰除臣按試一年有餘嚴查密辦尙無
本署書差作弊之案擬卽著爲定法書差補充止憑考試其從

前效敬禮物聽從千求各陋習概行革除
以上數條是否有當理合恭摺奏請

訓示飭部議覆遵行伏祈

皇上聖鑒謹

奏咸豐四年五月二十四日奏七月二十八日奉到

硃批該部議奏欽此

請

旨更正灌縣二郎神廟祀典摺

奏爲祀典傳訛請

旨更正事臣於龍安試竣後暫回成都省垣路出灌縣察得江
水分流處緣江水發源松潘廳邊外番地會集眾流漸成巨瀆
至灌縣都江堰口分爲內外二江馬班二史所稱蜀守李冰鑿

離堆避沫水之害竄二江成都中百姓饗其利者也李冰守蜀在秦時迄今二千餘年江水既分灌溉蜀中將二十州縣產米之豐爲天下口有功烈於民則祀李冰之有廟祀宜也乃臣至江神廟官場及土人咸稱爲二郎廟罕有知爲李冰者因查灌縣志內載李冰廟祀始於唐初川主二郎神封號始於宋初至元初始封李冰及其子二郎皆爲王

國朝雍正五年

世宗允四川巡撫憲德之請

敕封李冰爲敷澤興濟通裕王子二郎爲承績廣惠顯英王乾隆三十五年始定爲春秋二祭臣謹案李冰之子二郎於正史無可考卽令有子佐父成功亦當以李冰之祀爲重而其子口之敬繹雍正年間

敕封王號於父曰敷澤興濟於子曰承續廣惠章功
錫號次第顯然今廟中前殿祀二郎規模閎麗塑像巍竅後殿
祀李冰塑男女二像呼爲聖公聖母固已顛倒失倫不符禮制
且前殿二郎神像塑作三目旁列三叉兩刃刀及梅山七怪之
類臣不勝疑詫詢之士人始知爲小說中所載楊二郎故事荒
誕不經又混楊爲李而春秋二祭地方官苟且相沿行二跪六
叩首禮於其前甚非

國家尊崇命祀之意也應請

旨飭下禮臣核議如何更正之處交地方官辦理至成都府水
利同知駐劄灌縣專管堰工前任同知强望泰在任十餘年於
淘灘築堰身親勞苦蓄洩得宜至今口碑載道以後居是任者
多住省垣別圖差事以致衙署漸就坍塌應請

旨飭下嗣後成都府水利同知不得逗遛省垣以專責成而重職守合竝附陳伏祈

皇上聖鑒謹

奏咸豐四年五月二十四日奏七月二十八日奉到

硃批該部議奏欽此

請

旨飭裁陋規摺

奏爲請

旨飭裁陋規以恤吏困而肅官方事臣自上年四月出省按試於今年五月暫回省署其考過十五府州廳每接見各牧令詢問地方情形無不以上司到任及節壽陋規爲苦者緣各州縣每年致送總督藩臬及本管道府三節兩生日竝到任規禮缺

分口優者約一萬數千兩中下者以次遞減口瘠者十餘缺止
送本管道府從前川省稅契頗多盈餘近年置買田業者日少
稅契所餘無幾卽有鹽廠各州縣夙稱豐裕近因鹽務積疲俱
已漸形凋敝年來粵匪肆擾屢調川兵供億紛煩無非墊辦兼
以捐輸軍餉籌辦團練絡繹不停而上司各項陋規等於正供
不能短少其司道府州又以所得於屬吏者各效納於上官夔
關稅務日絀而各衙門陋規照舊夔州一缺久成畏途無人願
往成都華陽兩首縣到任但及半載賠累動輒逾萬厯任川督
惟徐口口在任數年屏卻餽遺至今屬員稱頌謂其培植地方
元氣不少口口到任以來一切概復其舊漸致辦公滯礙顯見
者已有數端盛朝輔揭告臬司口口口得受陋規一案口口迫
於事勢不能不奏迨奉

旨查辦口口中懷虛怯調停半載乃令府縣湊銀一萬四千兩
送給盛朝輔俾作歸資始具悔呈結案此陋規之礙於辦公者
一也錢糧津貼

恩加學額因州縣多徵少解控告紛紛奉

旨將及一年尙未咨行到臣經臣奏請

飭催始行咨部今年二月方奉到部覆而控告者又復數起年
時受其規禮不得不代爲耽延彌縫此陋規之礙於辦公者二
也續行指輸一事口口飾爲廉潔倡捐僅及一千各府廳州縣
統由上司派捐皆不過數百兩名爲公平概從簡齎藉示體恤
罔濟度支此陋規之礙於辦公者三也道光初年協辦大學士
英和奏請核定陋規數目有

旨全行裁革各省未能一體奉行積習難返視爲固然原不自

知爲貪黷惟值此多事之秋州縣萬分苦累若仍相沿不改將來軍務告竣之後川省虧空之案恐不可勝辦矣應請旨飭下督藩大吏整躬率屬力絕苞苴庶幾吏困少蘇官方自飭於目前兵差饟務尤有裨益臣愚昧之見是否有當伏祈皇上訓示謹

奏咸豐四年五月二十六日奏

畱中

恭報通省歲試及歲科並試等處完竣情形摺

奏爲續報考試情形仰祈

聖鑒事竊臣於上年四月業將成都府及資州綿州茂州松潘

廳理番廳歲試並八旗駐防武試情形恭摺

奏報在案旋於四月底出省按試眉州嘉定府敘州府敘永廳

廬州重慶府順慶府保甯府潼川府各屬歲試竝西陽州忠州
石碕廳夔州府綏定府龍安府各屬歲科竝試於本年五月回
省復於七月出省舉行邛州雅州府甯遠府歲科竝試次第竣
事茲於九月十九日回省俟清理歲試報部冊卷後卽當舉行
成都府屬科試臣查各屬文風以眉州嘉定重慶綏定順慶保
甯爲上餘雖不能一律勻淨然才雋之士無郡無之卽以西陽
甯遠之偏僻亦儘有才思傑出者但苦近來讀書人習氣專尙
詞華講求經史性理根柢者極少此時當秀才所習皆無用之
學他日登仕版安能爲有用之材臣於出示及面命時皆諄諄
訓以體用兼賅學識相輔期其尙友古人志濟民物諸生等多
有領會感發者文童槍圖之案經臣嚴行查辦漸就肅清至川
省武風素盛名將疊生故弓馬技勇佳者頗多錄取武童往往

因額滿見遺至武童愈考愈多臣於重名頂替者有犯必懲似亦均能畏法各學教官有訓迪之責除年力衰邁之員已歸計典甄別外查有新津縣教諭黃世品威遠縣訓導王應祥皆品行卑污屢被控告應請

旨卽行革職所有臣出省歲試及歲科竝試各屬情形理合恭摺具

奏伏祈

皇上聖鑒謹

奏咸豐四年九月二十五日奏十一月十八日奉到硃批知道了欽此

請

旨飭行速辦土司爭襲案摺

奏爲土司襲職請

旨飭行速辦事竊臣於八月按試甯遠府途次接據黑白夷民以河東土司安安氏安平康母子襲職一案紛紛呈訴臣停輿訊問略得端倪到郡後詢據甯遠府德裕西昌縣王銘稟稱西昌所屬河東長官司土司安世榮於道光十七年病故維時尙無子嗣照例以正妻安安氏

題請襲職是年十二月其妾安龍氏遺腹生子安平康經安安氏報縣轉詳安安氏與安龍氏不睦涉訟多年安龍氏復遣人京控咨回川省斷結咨覆刑部聲明土司印務仍令安安氏護理俟安平康及歲時襲替漏未咨明兵部道光三十年安平康以年屆十五赴縣稟請襲職由縣詳請部示經兵部查取宗圖冊結辦理咸豐二年四月交腳地方有野夷出巢焚掠經兵勇

擊退三年春間復來滋擾該鎮府因安安氏前次辦理夷務不能得力添委安平康竝阿都沙罵兩土司協同辦理安安氏沿途逗畱又妄許夷人銀布馬匹延騙不給夷情洶洶經保安營千總楊應彪與安平康深入夷巢設法駕馭始就平慰該夷目及交腳漢夷人等皆以安平康明晰有爲稟請接印辦事該鎮府縣因夷情緊急一面將土司印信交安平康承領一面申稟總督請以安平康先行代辦土司日後再辦理承襲安平康接印後復與楊應彪前往梁山將大頭保沙叩母雷呼曲等傳齊開導該夷咸知悔悟出具木刻不敢再行滋事悉散回巢安安氏所許夷人銀兩約數千金經安平康全數賠給完案本年正月安安氏以去歲野夷出巢安平康欲乘機奪權控經總督衙門提省發交成都府審辦委員往西昌提取印信而安平康之

妻安都氏帶印深匿夷巢差提未繳此安安氏安平康母子爭襲及地方官辦理之情形也臣因覆閱各黑白夷呈詞大約安安氏暮年任用非人屢致野夷滋擾不服夷情其庶出之子安平康年早及歲雖急圖襲職於理似未甚合而辦事妥貼實爲夷情所服此案自正月提省時逾半載夷民尙安靜待命近因有委員提印諸夷謂將還印於安安氏且或以改土歸流爲懼羣疑頓起漸恐負隅臣身至此間不敢意存畛域當經出示曉諭隨即飛咨督臣裕瑞令該土司母子早回並諭安安氏不必再圖權襲安平康務當曲盡孝道督臣回咨稱此案尙未據委審各員詳結現飭速行辦理臣到省後督臣業已出省接晤藩司楊培及成都府鄂惠咸稱安平康之承襲必須安安氏出具印結始合定例現委員前往開導安都氏令將印信交出方能

辦妥等語臣思該土司距省十五六站山川懸隔又當番夷雜處滇蜀交錯之區所管地方五六百里黑白夷人不下數十萬全賴長官司彈壓且現在鹽源與雲南永北廳交界之處復有土匪蠢動之信該土司地方與鹽源各土司相接長官一日不回卽夷情一日不安乃拘牽例案輾轉稽延自正月至九月案懸不結臣實爲邊隅慮之爲此恭摺馳奏伏祈

皇上訓示飭下地方官速行辦理謹

奏咸豐四年九月二十五日奏十一月十八日奉到

硃批另有旨欽此

敬陳地方情形摺

奏爲敬陳地方情形恭摺奏

聞仰祈

聖鑒事竊臣恭閱邸鈔知樂口裕口奏土司爭襲一案奉

旨將臣交部議處臣應得處分尚未接准部文惟區區愚誠實

有不敢緘默於

聖主之前者

臣此次按試甯遠由雅州踰大相嶺過大渡河而

南便入梁山地界左右皆係番夷中間一綫官道其生番襲脅

行人及野獸出山肆虐皆嘗白晝見之由成都省垣一千五六

百里方至甯遠其地與蜀遠而與滇近不惟總督閱邊多年不

到卽建昌道駐劄雅州阻隔山川亦屬鞭長莫及人煙稀少文

報罕通省中大吏久已視同隔膜臣至郡城時黑白各夷民呈

訴河東土司爭襲一案絡繹不絕察其情詞皆願得安平康及

早襲職任事臣思邊夷地面法在羈縻原不能以內地法律相

繩且省中於此等案件並不派大員前往查辦輒行提省久延
月日實不足以服夷情是以從權曉諭竝咨商督臣早令該土
司母子回家其時又值鹽源縣地方土匪竊發因春夏之間土
匪曾帽頂等滋事經鎮府帶兵往剿陣亡土司及武弁三員竝
傷斃兵練數百名旋因匪目假稱投誠將就了事至八月間匪
黨朱大勝等由滇境竄入鹽源署知縣周錫齡飛稟到郡求爲
發兵籌餉人心惶惶該鎮府皆躊躇無計應試各生員陸續至
試院呈懇設法解其倒懸臣因檄知該署令諭以用官不如用
紳用兵不如用練若聯絡所轄九處土司併爲一氣復於生監
中擇能事數人幫同防剿必可得力切不可坐候官兵耽延誤
事適於武場時見監射之游擊文陞人甚明白卽商之鎮府派
令前往幫同周錫齡料理竝捐銀百兩倡幫經費飭令生員等

趕緊回縣保衛鄉閭助官勦賊此事與土司爭襲一案皆臣在甯遠時迫於事勢忘其越俎輒行從權措置者也茲據該署令及該學教官次第稟知此股匪徒業已殲渠獲醜地方漸次肅清已稟由將軍總督核辦生員等以該署令明幹有爲民資保障呈懇畱任到臣查鹽源縣偏遠瘠苦又在甯遠之南三四百里實缺人員已多年不到任署事者視如傳舍罔顧地方周錫齡以候補同知署事乃能深得民心力殲股匪可否准其久署應由督藩酌辦其土司襲職一案想已由署督樂斌辦結至現因科試局門無從知悉然自正月提省至十一月連閏計之已及一年矣至川省近年吏治百端廢弛前次錢糧津貼多徵少解者不下二三十州縣督藩既不根究亦不令設法彌補日內臣衙門尙有控告安縣虧空倉穀一萬五千石會理州短解

津貼銀四千八百餘兩兩案現飭該州縣先行稟覆俟移交新任總督查辦川省數號豐腴捐納者多指省來川現在牧令中由科甲出身者不及一半卽如一首府兩首縣均係捐班餘口口以捐班知府甫經升道卽奏署臬司現仍代辦物議紛紛未息州縣中文理明通者甚少以致詞訟拖延不結考試時府縣錄送文童多未通順臣憑文取士致府縣案前往往被黜雖招嫌怨尙服士心若照例將文理荒謬之卷錄送至五十本卽降一級調用則府縣之升降調者少矣大吏不飭廉隅屬競思迎合計兩年來未見參劾一員卽著名庸劣之玉口全口亦尙任其戀棧其他不問可知雖連歲豐收民情安堵然怨譟繁興隱患斯伏幸新任總督黃宗漢不日來川先聲所至皆已情殷望歲矣伏見我

皇上宵旰焦勞邇言必察外間地方情形臣既有所聞見敢不據實直陳現有

欽使查辦事件省垣極其安謐堪慰

聖懷爲此恭摺具

奏伏祈

皇上聖鑒謹

奏咸豐四年十一月二十二日奏

東洲艸堂文鈔卷三

道州 何紹基 子貞

敘

武陵陳氏族譜敘

大人命代作

方今

聖天子以孝治天下天施之屬均歸悖敘每歲有宗親之宴有玉牒之修故

醲化醫然被及里黨凡士夫之家知禮誦詩者則莫不輯譜以聯其族之人雖然亦難言矣始而扐爲之繼而續修之沿焉習焉子與弟或茫不知所以爲譜之意則雖板寫秩然世系聯綴而聞見畛域有不如途之人者則何貴乎譜之修也年家子武陵陳子啟邁好學士也自館余家導矩襲規立行不苟又恂恂

然如日有父兄在其側者余每與譚憩知其家必邕然而肅肅然而恭既而知其方續修家譜也而請敘於余聞陳氏本浙江永嘉人自明永樂間有名瑾者隨中山王征辰苗始由浙江永嘉移居武陵旋失世職而子孫遂多游黌序崇禎間有名文錦者本副貢也合族以拒流寇族賴以全以後孝廉明經班班相望噫然則其家不獨能邕且肅如五代時義門陳氏上下姻睦人無閒言已也乃奇才迭出摩勵經緯紹先世之餘烈發名族之俊軌後先騰連以馳驅

皇路而且育繹繹屬屬而不絕者顧雲施沛離歸於其山木華清豔返夫其根夫所謂才行者亦惟於邕然肅然者培之翼之而不可以外求也啟邁持是語以示族之人其不以余言爲河漢也乎

魯服齋制藝敘

大人命代作

癸巳春魯服齋之孫宗德將爲乃祖梓其制藝藁不遠數千里問敘於余噫服齋已矣三復遺編平日之論議容色如在目中也自余與服齋爲同年同在史館紬書校字之餘尤好譚制藝其意謂代聖賢立言言之是非本其心之明與昧言之純駁本其心之邪與正學者日以聖賢所言之理涵泳其心則於立身行己之大綱應事接物之宜當可不大舛繩尺制藝於法雖不古而可以斂放心研書帙發揮才氣揆露器識故功令以之取士其未可末視也明矣但不可爲矜奇弔詭及庸腐浮淺之文以汨沒其性真耳逮余視學山左服齋由諫垣出爲觀察督糧德棣時相與銜杯講執其結習未少解也嗣復相見於京師則服齋意思積散有老人意不復能健談豪飲如昔日誰期別甫

半年大夢先覺一子又復繼歿余所以讀其文而不勝愴悵也
文僅六十餘篇蓋所存甚謹大都紬繹理緒溯原於其鄉先輩
五家亦或醕質似正嘉雄勁似國初要所謂矜奇弔詭庸腐浮
淺者皆無有焉是亦可以傳矣服齋在諫垣直聲觥觥然督糧
時釐弊恤丁籌度運務俱詳樸有條理不避勤苦吾見世之好
譚制藝者往往拙於時用讀是編者其亦有善窺服齋於制藝
之外者乎

宋元學案敘

大人命代作

周官經曰師以賢得民儒以道得民鄭注以德行六藝分屬師
儒蓋以小成大成別之實非有區域也然魯論孔子及門分爲
四科小戴記儒行列爲十五韓非子曰孔子之後儒分爲八蓋
道合於一者聖也其分而屬者儒也各就其性以成爲學而傳

授淵源遂亦不能強同漢書儒林傳專主傳經其言曰六學者王教之典籍先聖所以明天道正人倫致至治之成法也豈非以聖人之道悉備於經不待舍文章而別求性道哉歷代史家悉從其例唐書始易爲儒學至宋史而道學儒林分本末識者歎之故元史仍爲儒學至我

朝纂修明史仍從班掾統以儒林夫漢代醇儒皆敦行義有宋大儒無不治經或持所專習互相詆譏編且闕矣何與聞道乎余生於濂溪之鄉幼稟庭訓讀宋五子書後乃從事漢儒傳注自知所造匪深而於立身行事植矩度繩斤有以自守者於漢宋儒先遺緒不無萬一之得焉昔讀鮑琦亭集知黃梨洲先生於明儒學案外尙有宋元儒學案未及成編其子末史先生暨全謝山先生後先修補而世無傳本道光辛卯奉

命典試浙江留督學事壬辰春按試至甯波得樸學士王生梓材因以叩之以未見對甬上多藏書家屬其勤爲蒐訪歲試未畢余奉

召還京然未嘗一日忘是書也今茲戊戌王生再入都門居然以校刻宋元學案百卷定本至欣然詢其所自始知陳碩士少宗伯繼視浙學先得黎洲後人補本八十六卷而謝山原本之藏於月船盧氏構庵蔣氏珍祕不示人者亦次第出之王生乃與馮生雲濠合而定之整比譌舛修輯缺遺謝山序錄百卷頓還舊觀馮生復獨任黎棗之費尅日告成可不謂儒林之盛事乎抑論先河後海之義漢儒之功實先宋儒自先秦以迄有唐六藝源流具有端緒余門下士自王生馮生外若許生瀚沈生珪諸子皆研覃傳注能推明學術黎洲之於學案由明儒以及

宋元然則由宋元以上溯漢唐綜其師承門徑輯成一書其可少也哉余日望之矣道光十有八年戊戌夏六月

送儀徵阮宮太保相國師 予告歸里敘

道光十八年夏五月吾師太子少保大學士儀徵阮公以足疾久不愈乞致仕

恩旨俞允其秋八月將就醫於南以擢期回籍入奏復奉旨獎勵晉太子太保銜預期以頤養康彊俟

六旬萬壽來京祝嘏所以優眷耆德引以大年

恩禮之隆爲

天子御極以來 予告大臣所未有於時門下士自相國湯公以下數百人謀飲餞公公皆固辭紹基疑而進曰以弟子而餞其師不爲私城南野亭扶杖可至或設樽邸寓尤近不待步不

爲遠且勞吾師碩德懋功海內景矚今以末疾得請

天子眷之惜之朝野士若民慶之思之而固拒門人之請蒙竊

惑焉公曰余以一介書生由詞曹通籍以文字進奉受

純廟殊知

仁宗擢任封圻有勉爲一代偉人之諭今

天子倚任不衰俾入綸閣總先後五十年武功文事艱鉅萬端稟

聖謨資羣力因緣際會藉手集事而余未嘗有功焉茲

眷注方殷以不能步履之疾辭

闕廷伏田野揆之古人鞠躬盡瘁之義實媿且負退思補過是

吾志耳

恩命屢降悚懼弗勝其又敢以爲榮諸君其無重余之咎基曰

師之以盈爲冲以榮爲變則旣聞命矣今之歸也其可以適志
林泉消搖圖史乎公曰余祿精所入自刊刻書籍周卹姻友外
未嘗有餘貲以置別業邗上老屋數十間無園林水石之勝惟
庋藏四部書及金石文字都數萬萬卷自江湖故人凋落俱盡
繫此蠹餘是吾老友然心目旣瘁積癘健忘汎覽流觀無能爲
役幸有餘年將戢影息神屏絕人事以恭敬退讓慎晚節守法
度率先子弟勤厲職業庶稍免愆尤無重負
朝廷優視老臣之意基於是起而進曰吾師功澤被海內然深
謀碩畫入告

天子施之吏民者弟子不及悉知至於師之爲學由天文地志
以及六書九數性命之微虞夏商周以來其人其世迄於國
朝人物掌故岡羅貫串一本萬末凡所著述及其緒論弟子伏

誦既久又曰侍有聞要其指歸曰實事求是而已進中禮退中度巾幅蕭然猶以不能鞠躬盡瘁爲懼以恭敬退讓慎晚節爲勉早歲聞道老而彌勤其亦猶實事求是之愔也乎公瞿然應曰敢不力基退敬書之以敘相國王公以下之以詩送公者

湯海秋詩集敘

海秋語余曰學詩而不求之於孔子所錄之三百篇是沿斷港絕流而欲至於海也余應之曰吾楚人爲詩而不求之於屈子之離騷九歌天問諸篇是數典而忘其祖也若海秋之爲詩根柢性眞上躡風騷而又浸淫乎八代藻績乎三唐情深文明氣雄詞古數百年間作詩者林立才如海秋殆罕倫比海秋年未強仕存詩至二千餘首編錄既竣急以示余且曰學問之道無窮望子貞之益我也余曰詩者先王六藝之餘也藝以道精道

以藝善然藝也者無盡而可盡者也若道則無盡者也子之於詩富矣美矣今以後吾願子之博壹於道而不復學爲詩也道充於身德涵於心心與造物游而理於事類精乃演之於文乃聲之於詩萬情畢入萬象俱出將所謂三百篇離騷經者符契焉耳笙跣焉耳老子曰爲學日益爲道日損海秋旣豐於詩又欲大暢於文吾故欲以學道者損之損之乎益之乎海秋嘗曰知吾之詩者子貞也余蹇於詩而又窒於道君其將何以益我乎戊戌冬至前一日

沈雪友讀經心解敘

讀經心解四卷會稽沈雪友先生棣所著也其解易師卦小人勿用曰軍旅之際如必欲得忠信廉潔之人則智謀之士勇銳之夫皆將棄而資敵若袁紹之許攸趙宋之張元矣小人勿用

老父斥以卽卽而已解虞書贖刑云所誼疑則贖者誼疑於情
疑於法非疑於辭也五辭不簡自有正於五過之法若情法旣
孚而猶論贖則富者生而貧者死開利路而傷治化蕭望之之
言是也解濬畎澮距川云以禹迹而論河之所瀦止大陸澤耳
與江之有諸湖異而千餘年無河患則畎澮爲之也治河必自
畎澮始今以大河南北之地而開畎澮以匠人丈尺計之其受
水處不下洞庭彭蠡諸湖則下游之勢殺矣解以租鬯二旨曰
明禋云孔傳謂周公致太平致告文武夫君臣交儆曰慎一日
豈敢以太平告之宗廟乎蓋成王相宅還鎬較之巡狩爲重故
告於洛邑之廟也解禮記分爭辨訟非禮不決云若今律犯罪
親屬得相容隱盜則服愈親而罪愈輕姦則服愈親而罪愈重
若止以聽訟釋之似爲未盡其他類此者尙數十條皆務通大

義亦聞及於形聲訓詁至其說易宗王弼說書信偽古文師法不純正亦無傷廣大也先生壯後爲幕游究心當世之事爲梁沖泉司空百菊溪節相所倚重當司空陳臬湘南先生在幕中將各廳縣苗寨險易情形纂爲一帙後二十年苗變起當事得其書藉資方略人服其先見乃讀律之餘不廢治經復健於詩多可傳之作其志行可想見矣余獲交於哲嗣昌期因屬爲斟定遺集余方廬墓山中故不論其詩而揭其解經之大旨於簡端道光二十有一年孟秋月八日書於九子山廬

甘石安金石題詠彙編敘

甘石安郎中輯古今金石詩得三千餘首題爲金石題詠彙編出以示余曰今之譚金石者爲考據也聲之詩歌則詞有虛與委蛇不皆典實輯而錄之亦不致大雅之譏乎余應之曰說經

似經說史似史注老莊似老莊然則說金石文字似金石文字可也君知金石文字以有韻者爲重且先而無韻者其後起乎自傳記所載堯戒湯盤武王盤鑑刀劍諸銘金人嘉暉讒鼎比干銅盤諸銘正考父鼎銘孔悝鼎銘皆韻語也其不爲傳記所錄而流傳至今日者但記人名官邑爲頌禱眉壽永寶用之詞董董異於物勒工名之例不皆足以言文也石刻之最古者峴嵎禹碑周宣王獵碣皆爲四言韻語如雅頌穆王壇山石刻吉日癸巳則每兩字各爲韻尤古逸矣秦詛楚文句讀長短參差亦半皆用韻始皇刻石太山嶧山琅邪臺之罘山之罘東觀碣石會稽皆韻語也兩京碑有銘詞者皆韻語其無銘詞者則或然或否蓋漸趨簡易矣乃若就考金石文字爲文字者亦莫先於有韻之文而無韻之考證爲其後孔子觀金人之銘謂弟子

曰此言實而中情而信雖非韻語固儷語也王孫滿之答楚子問鼎也曰貢金九牧鑄鼎象物百物而爲之備又曰天所命也未可問也皆韻語古備音如服呂氏春秋曰周鼎著饗饗有首無身食人未咽害及其身亦韻語又周鼎著倮而鬺其指先王有以見大巧之不可爲也倮指爲爲韻也又曰周鼎有窮曲狀甚長上下皆曲以見極之敗也窮曲見極皆雙聲曲曲又自爲韻也至西京時張敞考識美陽所得周尸臣鼎謂不宜薦見於宗廟諫疏之體不爲韻語其詞氣特雍容和雅不鑿空於文字間也石刻之見於簪錄者始自酈道元水經注所列古碑略具首末不詳文字亦時用駢語韻語先是晉王彪之會稽山刻石詩已見詠歌矣然其詞曰文命遠會風潭道遼秦皇遐巡邁茲英豪亦僅據懷古之情而已唐人作者浸多然高適夫宓于賤

神祠碑詩及陳十六始興碑詩皆初勒石非詠古刻也杜子美
陳倉石鼓苦縣光和等語特綽略其詞至韋左司韓退之之於
石鼓始大放厥詞左司晚乃讀書其云忽開滿卷不可識或無
足怪退之能讀科斗孝經及衛宏官書其於石鼓歌亦止以鸞
翔鳳翥珊瑚碧樹爲形容之語不詳及其文義者古人神志渾
淪見其器想慕其人其世長言詠歎不復致覈於形聲點畫時
日地理之間後之爲是學者謂可以補證經史裨益六書斤斤
焉抱殘守闕字摩而句辨之如經傳注疏學益密而道益苦者
去古日遠恐愴不得其實也或遂謂詩歌有韻之文於金石
之學非甚貴尙者無乃持論已卑而不察其本乎且古人疏解
考證之文亦多用韻語春秋之有三傳也禮經之有記也爾雅
之爲訓詁祖也半皆韻語也然則以依永和聲之法寫吉金樂

石之心事歸荆寶義兼諷喻較之歐趙以來從事金石者或至小言麇麇瑣屑鉤稽使讀者不能以句其於導人以慕古適性果孰爲愈耶余於金石好爲考證亦間有詠歌書此以復石安將以爲阿好而張之乎抑尙有徵而可信乎願更質之天下魁閎嗜古之儒治金石之學者

鄭雲麓觀察文集敘

昔聞之潘少白山人曰淡於仕進而果於任職鄭考功之爲人也又聞之同年張亭父曰吾鄉鄭雲麓觀察人知其能詩不知其任道甚力爲文有樸氣非僅以詩人名者顧余以年輩差後與先生聲相聞而迹未合先生所施未竟遽成古人余聞之爲慨然也知守齋詩集久已流傳於世今哲嗣韻齋最其遺文蒙以見示余受而讀之曰潘張兩君子之言益信矣夫文以載道

也道何寓寓於志與事而已記曰官先事士先志聖教之衰也
更忘其職士墮其業相習爲雕幾纂組之文不適於用而道之
寓焉者嗇矣今觀家廟族譜書院諸記序何其志之懂也論沙
坦礮臺諸書何其事之密也其他論古敘事諸作大抵務歸平
實不尙奇詭浩渺之說觀其文知其爲君子人矣因憶去年姚
石甫問余以思不出位之說余曰時時事盡所當爲或以爲
隨境易慮不知止此實心務實徹到底耳思不出位卽易地皆
然也石甫曰然讀先生文有當於此義者因附記之

瞿吾山詩敘

大人命代作

與吾山兄交三十餘年矣夙聞其能詩未數數觀也壯盛促刻
揮手雲散自吾山歸爲校官復出爲縣令公私奔走蹤迹無定
所或數年不獲一相覿然名山水之游物理人事之涉歷爲學

日益識與境會固知其詩之日進也去年吾山以需次至都時
時過從談藝甚樂旋出爲館陶令不數月政聲卓然聞其日坐
堂皇案無留牘又精力健勝不減少壯噫人生年逾六十則齒
搖髮脫耄將及之若吾山者非有得於中而無所動於外其能
然歟存詩不多千里郵示余迫官事執掌又歲暮風雪促促短
晷綽略讀過未及往復然而忠孝之性師友之誼感時紀事弔
古述懷名篇脩句絡繹湧沛如壑源之波挹之而愈深也如幽
谷之蘭采之而益遐也如布帛菽粟至樸至淡而日用不可厭
也世之言詩者尙馳騁者昧指歸宗古淡者翫篇幅大抵不得
其本肥瘠淺深都非佳境若吾山之爲詩固有深於詩之外者
而其詩遂能若是也然乎否乎春風已來衙齋晝清訟庭花開
甘雨滿缶想見微雨春草堂中吟聲出於戶外也因寄歸其詩

卷輒書此以爲之敘時道光戊戌春正月

玉筍堂詩敘

道光甲辰秋七月余與萬藕舲學士使黔行至沅州阻雨謝篠莊大令同年來晤於行館適後院有隙地頗就蕪余曰何不及此雨候盡與種竹乎篠莊欣然卽令人於城外移來數百竿不半日間風稍霧葉修篁成林余聞篠莊爲令敦俗重儒士氣興起因題一額曰玉筍堂蓋非徒記一時會合游憩之樂亦冀此邦人士抱節浮筠干霄直上有如此竹也旣別後復作此詩紀事以張佳話寫餘興焉

望九子嶺詩敘

九子嶺者先文安公葬處也自庚子春仲見背秋仲扶柩南行冬杪至長沙卽出覓地跋涉三閱月不可得一夜驟與三五兩

弟行山野間遇石碑刻一女開九子五大字竊而思曰得無地名有九子者乎適門人楊鐵星來言乃翁臆先公至其家乃翁問佳城何在曰在瀏陽鐵星又言一女者非謚中安字乎友人李載庵習書爲家言於近邑游迹蓋徧因以詢之則曰湘西晉所家也五里外有九子嶺恆所往來未見有善地余曰既有是嶺地是在是矣堅挾與俱往始一二曰藹足荆莽中無所得一日五鼓行至天明延緣至一平岡豁然開朗心覺有異余曰是矣載庵亦首肯旁兩輿夫嘖嘖稱善余顧曰汝何人亦解是平間其姓一劉一楊也余意遂決地主人鄭氏初不知余爲何人成契後始告之其父子咸詫曰自去年三月來山上恆夜有火光村里驚救迫視則無之如是者屢屢今蓋驗矣閏三月得地四月卜葬余居墓側造墳垣立饗堂恭勒

御祭文暨

御賜碑文立於饗堂之前楹儀徵阮相國師所撰神道碑銘立於內楹置墓田種樹至歲底而事畢次年服闋由江南奉母入都供職別墓以來忽忽三載黔試甫竣長沙友人唐印雲書來謂我必歸諄諄延伫卒以迂道往返須耽延月餘請假不便省墓莫由悽懷惘惘左右百端拉雜成詩聊攄思慕云爾

恭擬增修一統志

御敘

大清之受天命有天下增式廓而大一統者於茲二百年惟我列祖

列宗威惠湧流聲名懿鑠幅員之廣政教之隆地利物華之盛官方民事之詳且備爲義繩軒駕以來所未有也

聖祖仁皇帝始命纂修一統志

世宗憲皇帝重加編纂至

高宗純皇帝御極之八年始成後至四十九年繼續成書是鉅重規經緯翔寶

仁宗睿皇帝命史館重修未及蒞事洎於朕躬承神器

付託之重撫茲區宇惟日兢兢祇繹體國經野設官分職之天敬溯五六十年來我

皇祖

皇考所以因時順地斟酌變通者歲有紀而月有程使非及時編輯俾

舊典有所述而後事有所承朕實愧且懼焉茲全書告成沿述於開國之初增輯至於嘉慶二十五年爲卷五百有六十較舊

志增多將二百卷非務爲繁富以侈示後嗣也惟我祖

宗以仁義中正治天下凡所損益如權衡之於輕重如度量之於長短大小一州郡之升降一官職之分合一臣一民之彰瘡予奪無非本

單心之宥密垂爲律度布爲官禮除繁存質扶條就貫甫獲成編實闕略是虞而何繁富之有溯惟禹貢九州爲後世方志之祖周禮大司徒以天下土地之圖周知地域廣輪之數至漢書郡國志以下紀載日詳唐宋以還若寰宇地理始自爲一書然而政教所及皆不古若惟我朝

祖德

宗功直繼五帝三王之盛可知

心法治統不異地異民而理卽觀其迹而道載焉矣朕惟乾惕
震懼以紹述

前人之成烈深知守成之難不殊於創始惟願爾內外百職事
罔不恪恭以慎固封守阜成兆民亦越我後嗣子孫尙其繼繼
承承無疆惟恤亦無疆惟休續有編錄視此典型是則朕之望
也夫

僧六舟金石書畫編年錄敘

六舟長老自爲年譜題曰金石書畫編年錄者以生平於經禪
之暇酷嗜金石兼及書畫也方外之傑究心書畫者自古不乏
從事金石因以攷訂史誤證明古篆真草源流自六朝以來至
於今高僧夙衲中未之聞也自六舟始六舟與余譚此事者廿
年矣每行腳所至得有拓本奇祕者必以其副寄我於京師余

因常常想見荒山古麓奇峯大雲中人迹所不能至或樵路僅存或孤塔忽露往往殘鐘敗碣恍忽有字與霧艸一色六舟方杖錫戴笠與猿鳥爭路燒敗葉藉濃落出甌椎登登有聲山谷皆應無論所拓有字無字字或醜或妍或古不古而其一往清浩遠之氣與千年前古人相接而天地閒無文之文無象之象變現於煙雲洞壑草樹閒者亦因以畢領其奧異斯所得者富哉富哉余性喜學書而亦好爲金石攷訂之學又兼及畫理今年銜恤南歸憩暑於淨慈寺六公適主方丈晨夕譚藝者五十餘日兩人者好談好駁時適酷熱不得雨湖光如火水漸渴將不可以舫六公欲破吾悲涕則日出其積年所蓄金石打本及所藏名書古畫相與欣賞訂正有時辨駁風起奇論電發蚊蹲於鼻汗流被體而不知也旣而歎曰此境未易得也君盍

記之於金石書畫編年錄庚戌年六月七月之二簡

濂溪周氏族譜敘

族譜之輯所以使族之人知千枝萬葉之皆出於一本而生孝弟之心也非必待它人作敘以侈之也況濂溪周氏之譜更何藉藻飾於人言而人亦何敢自忘卑劣昧昧然以敘之乎今吾丈穉青昆弟以譜示余而余不能已於言則何也周氏之先出自青州與吾何氏同然周氏之占籍道州自元公之前已世蓋先於何氏者百餘年我何氏自元末來此遂與周氏世爲婚姻兩家族系皆蕃家敎文學亦略相似其父兄必老成敦厚型範於鄉其子弟必怕謹退讓秀而有文或出於塗翹於郊惟兩家之人大約可望而知也嗚乎豈非君子之澤可以百世而芳臭所及被於姻黨者深且遠乎望後之人之食德服疇者守先型

於無替也元公家道州葬於南康二子遂分籍而居其在道州者二十餘世而聚處其在南康者散於江西浙江江蘇各行省然其支派行輩近可指而呼遠可溯而稽則獲讀此譜之功也余既爲敘是譜方擬遊廬山拜元公之墓訪其支族之在彼者而觀其家法焉

善化張氏族譜敘

善化張氏於明初自北直隸隨吉王至長沙隸善化洋湖鄉明末苦催科族人星散既入

國朝錡生公招集愼生公諸兄弟歸籍後值歲旱愼生公勸爲洋湖小河開壩引水灌田一鄉之人至今賴之蓋幹力隱德所益於宗族里黨者甚多此其瑩瑩大者珠媚玉輝鬱而必耀至吾師掖垣先生錡生公之元孫也始成進士起家詞館出爲邑

宰始捐資建宗祠勸爲艸譜譜未竟而遽逝然哲弟紫垣輔垣
兩翁卒能踵成未竟之緒蓋敦本收族仁人孝子之用心藹然
在棣鄂間而諸郎諸孫皆讀書有文行桂質蘭茝翔聲鬯序有
尊讓之風無浮詭之行其後之蕃大貴盛所以亢其宗而茂其
族者蓋未有艾也余亦方修敝宗何氏譜蒙輔翁持譜略見示
欣然有同志焉謹書數語於簡端

符南樵寄鷗館詩集敘

與南樵論詩屢矣過辱撫雅以詩集見示人事錄錄未及細讀
綽略觀之意境甚厚功力已深迴非尋常塗附者流然微諦之
似乎意欲成家而未可驟得者焉乎不變則不進不脫則不成
從此擺盡集曰直透心光將一切牢騷語自命語摹古語隨便
語名士風情語勉強應酬語概從刊落戛戛獨造本根乃見鄙

見雖偏然自家用功命意如此卽所貢於知我者亦如此請其勉焉可乎

舒自庵觀察遺集敘

舒自庵觀察既卒之後六月其孤孔安奉其遺集來屬爲酌定因竭兩晝夜之力披閱一過有不必存者汰之字句有煩複者節之以先生耄年嗜學虛懷下逮音容雖齊文字間如或遇之賞奇析疑貢其所知期以質死友於地下蓋旣悲先生之逝又喜能讀父書者繼起有人也先生之言曰余生平無著述非有心得及有關政理之言不存也今觀斯集於讀經論古治身居官及退歸時理家居鄉凡所嘗用心之處皆有記錄不嗜奇不務博平平實實所言者皆所行也所望於人之行者皆已所能行也敬儉於一身敦睦於親族師法於古賢忠告於友朋至於

修族譜以芘本根設賓興以培士氣速殯葬以教孝思尤殷殷致詳焉反覆玩之洵足藥浮華詭薄之習而返人心風俗於醴龐仁厚之世矣視修辭之士矜言曠輿使人讀之舌撝不能下顧於身世無秋毫裨補者所得爲何如耶道光初年余隨侍先公於山左督學任其時稱循吏者李復齋徐樹人張翰風及先生吏治號爲極盛己亥使閩來往俱道出德州因叩以居官記載則欣然曰平平無奇蓋無足示人者庚戌夏余以母憂南歸過浙相晤於海塘工次見其所寓于役鬚髮俱瘁然炎風酷雨中不改其道貌之怡愉也比年僑寓濟南適先生退歸已久靖安原籍慘爲賊擾因就養來東時相遇從始得窺其平日厲行之實知所以能爲循吏者積之有素非急切要譽者比而晚景所遭夷險一致仍惴惴然不懈研慮說心之業信爲學道有得

也余以母忌日廢生日先生不知也上年年屆六十承手書聯語爲賀余以誌慟詩復之先生書來引過逾分余益感其見愛誠篤非世俗所有今年正月廿三日使者持簡來云欲面談始知其乍感微疾午後往視甫入門而先生屬纊矣入哭之爲一慟輓之云循吏久蜚聲卽今就養懸車自有千秋在身後高年猶講學豈意彌留折簡愴令一面缺生前蓋紀實也孔安泣曰吾父自知不起欲一見先生者蓋相託以身後之文耳余聞此言愴惻深矣今幸得其遺集而讀之復書此以弁其端庶足以塞吾悲而報先生所欲言者乎

宗迪甫躬恥齋詩集敘

宗子迪甫於丙辰丁巳間刻其躬恥齋文集於京師與梅伯言柏規山房集竝時傳播伯言之文婉雅出於歐陽人多書之吾

獨謂迪甫之文詞意肅潔堅覈有據傳誌敘事諸作可以信後
者伯言有不逮也今迪甫又將刻其詩而欲余爲之敘余遲遲
未應君固索之又屬余芟香代索之今以巡河之役暫至濟南
復面爲諄督且曰詩原不待敘敘亦何必子貞念吾自少時隨
侍楚南先君逝後奉母於永州居最久沅湘間魁儒韻士靡不
諧際四十餘年來舊時所嘗捧手受教及題襟譚藝諸君淪謝
殆盡其塵存者又睽隔不得晤語眼中吾子其何吝一言余於
是起而應曰君之言感我哉雖然吾何敢吝也蓋生平不喜爲
人作詩文敘以迹涉標榜且得失工拙當俟讀者自領之若惶
引者先爲指陳本末卽使所言皆當於作者意志章襮盡矣尙
何寸心千古之有今君詩墨諸版者過半余尙未盡見也其不
待章襮也明矣自吾兩人以文行相砥礪三十餘年矣攻苦綴

述偶一相示則欣賞與鍼砭俱有之未嘗爲貢諛之論君旣刻
詩請一論詩可乎孔子曰溫柔敦厚詩教也又曰不學詩無以
言蓋善讀詩者可化氣質之偏而返性情之正善作者當亦然
杜甫之爲人言動皆有繩尺余則疏野無檢攝迹若不相近者
至於爲學務剗削浮華期自得本心之實又道人之善惟恐不
及兩人蓋同之惟激而不隨澹而少嗜自謂與人無迂而人或
遠之以爲落落難合得無氣質之偏有相同而皆不能自化歟
何以化之溫柔之以詩敦厚之以詩可矣余年逾六十杜甫又
長於余七年求如壯盛時志意銳發不可復得且時事方殷故
交零落芝焚蕙歎懷抱之惡正復相似然猶終年把書惜此炳
爛研覃道味心心印之雖老矣學尙當有進也獨詩也乎哉獨
文也乎哉其勉之而已矣

孝友堂張氏世澤錄賢書錄敘爲張升谷作

齊河張升谷徵君重修族譜成復因宗人之請畧錄先世制藝爲孝友堂張氏世澤錄又蒐輯二百年來闔試獲雋之作爲賢書錄附焉刻旣成以印本見示曰將以清明合族之辰令族中子弟之秀良者各領護一本俾有所感動而奮發子其爲我弁以一言余肅然應曰秋霜春露孰無先疇舊德之思是錄適剖劂畢工因以爲杯棬手澤之詒使得聽彝訓而誦清芬孝弟之心務學之志有不油然而生勃然起者乎升谷又曰吾宗無以文字登上第者惟孝廉明經相屬不絕亦云幸矣懼後來之漸卽於荒或有高明之資薄視制藝致昧於孔孟之訓者以是錄示之或不至數典而忘祖乎余曰聖賢之道深矣博矣竭天下之才與學不足以盡之況制藝乎然族中子弟誠能日讀五經四

子書且能爲制藝其悖於聖賢之道者亦罕矣卽有異人之秉
研窮性命探索古今其初枕學步舍此將何道之從乎因受而
讀之凡在是錄者理法一本先民絕無浮囂放蕩不守繩墨之
作益以知張氏世澤之長宜其垂示後人者如此平正靜深可
久遠而無文字之弊也升谷以道光乙酉拔貢生出先文安公
之門至咸豐戊午己未間余主講灤源君方膺孝廉方正之舉
銅鑄老儒從游日眾仍不憚逐隊秋闈以爲子弟先文筆厚健
雖於時尚不盡合而於一身一家所以守先而待後者卽其文
可以見之是古篤行君子也余向不作時文敘因張子之請而
爲發揮其旨誠有感於余心也乎咸豐庚申三月朔

古音類表敘爲傳青餘作

文字所興先有聲後有形聲陽也故善變形陰也故不變不變

者可從一貫萬據形系聯許氏之書所由作也善變者欲與分別部居實難近來爲古均之學者漸密矣然止能據經典分部次於其所以變者莫能究詰也今傅子青餘獨悟神情由五聲十五部推源三統固前賢所未發實天道之自然雖全書未出而攬其大綱犁然有當於人心何快如之

陳松心撼山艸堂詩集敘

郴州陳筠心天下士也才高志奇於學無所不窺其仲弟松心天姿稍遜亦能絕去流俗卓然與難兄相頡頏道光乙酉余來湘應鄉試時祁春浦相國爲學使所錄拔貢生稱最得人余多獲締交而於筠心至款洽壬辰北闕余甫至都筠心卽來迎與勞辛皆同下榻於所居寓齋辛皆時爲應常日作官韻賦余好爲詩與黃香鐵張亨父張淵甫湯海秋諸君時有唱和筠心從

不過問偶一談及所取惟兩京六朝至盛唐而止余見其絕不
簪述時時規之輒笑曰姑待之何如余入詞館後所爲詩益多
筠心更不一語道及不虞其驟歿也悲夫今松心之子善堉爲
瀏陽學官與筠心之子善坦錄兩翁之詩見示皆刪除之應存
者蓋松心亦以被賊劫不屈絕粒歿已八年矣嗚乎兩君皆負
經世才鬱不得竟其用松心於道光十三年條上禦謠計郴得
無事後預度粵匪將發作南言十三篇又條畫守郴事宜數十
事郴人賴之卒之毅魄凜然歿可不朽筠心官吏部郎先公時
爲少宰都中捐賑章程有准各衙門候補人員捐免保舉作爲
儘先一條筠心上書數千言謂儘先可捐則正途盡化爲捐班
有傷政體以正途亦非儘先不能得缺也先公隨之遂力主駁
議其持正不阿類如此至余與筠心切磋之誼在語言文字之

外者所謂相視而笑莫逆於心二十餘年如一日兩君雖工吟詠持論過高存者絕少既寫有定本又得羅研生王壬秋覆密付梓雖寥寥數卷而懷抱之奇志慮之遠亦可覩其大凡矣筠心天性慧絕松心以樸勝然松心雖以明經終足迹不遠涉灰入忠義祀是尙有可傳於詩之外者筠心由甲科通籍京居時氣蓋儔輩交游徧天下所存詩止於丁丑時方遘弱冠耳後遂不得一字無乃遺藁散軼其子弟未及蒐輯耶抑其棄者仙佛家言果有長不灰者在耶吾不得而知之矣同治元年七月

使黔艸自敘

同人見余使黔詩艸皆欣然爲之敘各道所欲道文詞暢美閱者讀諸君之敘卽吾詩可不必觀亦不足觀矣顧余平生詩文隨手散漫不自收拾雖自覺精力可惜亦無如何今既刻此三

卷示門人子姪平日用心之故尙有不能不爲者告者復自
爲之敘曰詩文不成家不如其已也然家之所以成非可於詩
文求之也先學爲人而已矣規行矩步儒言儒服人其成乎曰
非也孝弟謹信出入有節不愆於中亦酬應而已矣立誠不欺
雖世故周旋何非篤行至於剛柔陰陽稟賦各殊或狂或狷就
吾性情充以古籍閱歷事物真我自立絕去摹擬大小偏正不
枉厥材人可成矣於是移其所以爲人者發見於語言文字不
能移之斯至也曰去其與人共者漸擴其已所獨得者又刊其
詞義之美而與吾之爲人不相肖者始則少移臨繼則半至焉
終則全赴焉是則人與文一人與文一是爲人成是爲詩文之
家成伊古以來忠臣孝子高人俠客雅儒魁士其人所詣其文
如見人之無成浮務文藻鏤脂剪楮何益之有顧其用力之要

何在乎曰不俗二字盡之矣所謂俗者非必庸惡陋劣之甚也
同流合污胸無是非或逐時好或傍古人是之謂俗直起直落
獨來獨往有感則通見義則赴是謂不俗高松小艸竝生一山
各與造物之氣通松不顧艸艸不附松自爲生氣不相假借泥
塗草莽糾紛拖沓滯澀不別腐期斯至前哲戒俗之言多矣莫
善於涪翁之言曰臨大節而不可奪謂之不俗欲學爲人學爲
詩文舉不外斯悒吾與小子可不勉哉可不勉哉

去蜀入秦紀事詩敘

道光三十年春

皇上嗣服命中外大臣保舉人才以備破格錄用余時丁母憂
回籍張筱浦少寇以登薦牘咸豐二年三月服闋七月入都蒙
召對於圓明園八月初六日

簡放四川學政初九日

召對於乾清宮

垂詢家世外於諸經注疏正史綱鑑宋五子書及說文繁分之
學竝原籍道州被賊湖湘防堵情形由京至蜀沿途關河道路
溫語諮諏靡不曲至跪聆占對暑移六刻始出九月出都十一
月抵蜀於恭報到任摺內奉

硃批一切地方情形隨時訪察具奏蓋蜀中吏治積疲

聖明洞鑒久矣三年春歲考成都就試事力求整頓五月奏報
考試情形奉

硃批汝能如是認真朕甚嘉悅嗣後出省按試有關係吏治民
生軍國要務者隨時上聞四年夏秋閒以南江縣鄭懷江冤獄
及大吏需索陋規河東土司安安氏安平康母子爭襲各案先

後馳奏 欽差大臣前來查辦悉如所議平反辦結浙撫黃壽臣中丞

御賜扁額褒爲忠勤正直者也茲

特擢爲川督言官或以蘇杭保障奏留之

上意重在蜀不之許壽臣與其兄岵生孝廉先後出先文安公門下又與余五弟子愚爲兒女姻親素日講求經世之務與余最洽聞其來爲蜀人慶且其濟一方尤私相慶也壽臣以三月杪抵蜀任於余所奏南谿縣廩生萬時恬被誣逆案及各州縣錢糧津貼多徵少解之案俱奉

旨平反懲辦吏治一清至五月廿四日余科試潼州完竣回省知於四月內因縷陳時務十二事

上責其肆意妄言由部議以私罪降調矣六月八日交印於壽

臣卽移居中協閒署清釐解部冊卷畢七月初一日出游義眉
瓦屋市月回省士民上扁建祠立碑紛紛相屬壽臣率屬議知
資勅立艸堂書院如學海堂詒經精舍之例欲以畱余樂彥亭
將軍亦謂民望所歸殷拳挽轡余念以舊學使作寓公於公私
皆非便決計去蜀入秦它日或入都補官或暫還鄉里從容再
計也適壽臣屢有小恙不忍言別旣定期九月十九日啟程余
於十八日獨先出城矣行途雨堠旅館寒鐙憶校閱之辛勞念
士民之感戀新雨舊雨相應相求悵惘盈懷拉雜成詠得七言
律三十二首因風寄與俾士民知我之不能忘蜀人猶蜀人之
不能忘我也咸豐五年歲在乙卯十月廿一日